

سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ٢٥ نوفمبر ١٩٦٨

الحاضرون

الرئيس جمال عبد الناصر، على صبرى، حسين
المحسن أبو النور، لبيب شقير، كمال رمزى
الشافعى، أنور السادات، محمود فوزى، عبد
استينو، ضياء الدين داوود.

المحتويات

الصفحة	الموضوع
١	١- تفاصيل اضطرابات الطلبة فى المنصورة والإسكندرية والقاهرة
	٢- عبد الناصر .. اختلاف كبير عن أحداث فبراير ١٩٦٨
٩	تحرك الجيش فى إسكندرية كاحتياطى للشرطة
١١	أسباب اقتصادية وراء الأحداث، كما لا يوجد حبس ولا اعتقالات
	قلب الرأى العام على ثورة الطلبة، وتطهير الطلبة ورفد المتورطين وتجنيدهم قبل
١٤	فتح الكليات
١٨	دعوة اللجنة المركزية لمؤتمر قومى يمثل فيه طلبة وأساتذة، وفصل الطلبة عن
٢٣	منظمة الشباب وعمل تنظيم طلابى
٢٧	٣- اقتراحات العمل داخل اجتماع اللجنة المركزية يوم ١١/٢٧
٢٨-٣٣	٤- تنظيم الاتحاد الاشتراكي العربي وانتخاباته

سرى للغاية

محضر اجتماع اللجنة التنفيذية العليا للاتحاد الاشتراكي العربى

برئاسة الرئيس جمال عبد الناصر

القاهرة - مقر الاتحاد الاشتراكي فى ٢٥ نوفمبر ١٩٦٨

عبد الناصر: الحقيقة مش عاوزين نقعد جلسة طويلة، نتكلم أولا بالنسبة للموضوع بتاع الطلبة باختصار. إحنا عارفين قصة المنصورة كلها؛ قلها لنا باختصار واستنتاجاتك، وبعدين موضوع إسكندرية يقوله لنا لبيب باختصار واستنتاجاته، وإيه هى الاقتراحات يعنى بالنسبة للموضوع.

السادات: يعنى بالنسبة لموضوع المنصورة، هو اللى حصل ابتدى فى يوم الأربعاء اللى فات بمناسبة صدور قانون التعليم، طلع مدرستين فى المنصورة مدرسة إسماها مدرسة الكامل ومدرسة إسماها مدرسة الفلال بتوع الطلبة اللى فابتين السن اللى فوق الـ ٢٥ و ٢٦، ومدرستين خاصتين مهماش مدارس حكومة. وطلعوا على أساس إن هم تصورا إن القانون يحرمهم من إنهم يخشوا على الفرص اللى بيديها لهم والتسهيلات اللى موجودة فى القانون القديم، وأظن القانون الجديد بيحرمهم من هذه التسهيلات. وطلعوا المدرستين وراحوا على بعض المدارس طلعوها، وبعدين راح لهم المحافظ وراح لهم أمين الاتحاد الاشتراكي، وخذوا كلامهم واتصلوا بوزير التربية والتعليم - وكان موجود فى المنيا فى ذلك الوقت يوم الأربع بالذات - فوزير التربية والتعليم ملاحم مذكرة عن تفسير القانون بما يرد على كل الكلام اللى قالوه. وطلع الكلام اللى قالوه مالهوش أى أساس.. هى الاستنتاجات اللى وصلوا لها يعنى.

فى يوم الأربعاء ده حاولوا يطلعوا المعهد الدينى مرضاش يطلع المعهد الدينى خالص، وبعدين يوم الخميس الصبح المدارس منتظمة فى مكانها تماما بعد ما اقتنعوا بالكلام التفسير بتاع وزير المعارف اللى ماضيهم عليه المحافظ كمان. المعهد الدينى، مدخلش المعهد والساعة التاسعة إلا الربع إبتدى يتحرك فى مظاهرة، فراح له المحافظ وبرضه أمين الاتحاد الاشتراكي وحاولوا يقنعوهم ومشيو وراهم من تسعة تقريبا لغاية الساعة واحدة. ودى الغلطة اللى حصلت مكانش يجب، ولو فرقوهم من أول ٥ دقائق أو من أول ساعة كانت العملية انتهت!

إنما مشيو وراهم لغاية الساعة واحدة.. الساعة واحدة رجعو المظاهرة وكل واحد شايل حته خشبة فى إيدته واللى خلع البتوع دول اللى بيعلقوا عليهم الرايات، وراحوا حاصروا مديرية الأمن!

سرى للغاية

يعنى الظاهرة اللى لازم نعرفها كويس ان نتيجة مظاهرات فبراير اللى فاتت وإن البوليس مضربش الطلبة! ومظاهرة قبلها بيوم وأربع ساعات يوم الأربعاء وماشى البوليس بيحلق بيحوط عليها لكن مبيمسش حد خالص! العملية دى برضه طلعت العيال راحوا محاصرين مديرية الأمن ذاتها فى الميدان. جنب مديرية الأمن مبنى المحافظة الجديد وفيه طوب وزلط استعملوه بقى مطر نازل على مديرية الأمن؛ النتيجة لهذا ٩ ضباط إتعمروا و ٣٠ عسكرى!
ضرب.. حصل ضرب على طول من مديرية الأمن على الحوارى من ٣ آلاف الى ٤ آلاف، والشهود اللى كانوا موجودين والمحافظ وأمين الاتحاد ولجان الاتحاد الاشتراكى.
المظاهرة .. أنا بقول على يوم الخميس..

عبد الناصر: العملية دى الحقيقة أنا شفت تحقيق وأقوال الشهود بتوع الأمن للنيابة، دخلوا والعساكر كانوا قليلين دخلوا وقفلوا الباب، فالولاد حرقوا وبعدين خلعوا العواميد اللى عاملينها علشان رمضان وخدوها علشان يضربوا بيها للغاية..

السادات: مايقتموها. هم دخلوا فى أثناء بقى سير المظاهرة فى ال ٣ - ٤ مظاهرات الصبح العملية إتجهت للتخريب بالكامل.

أولاً: خُربت جميع المدارس اللى فاتت عليها هذه المظاهرة وراحت تطلعها.. جميع المدارس إتخربت وتلفياتها لا تقل عن ١٠ آلاف جنيه!

ثانياً: فى السوق بتاع رز قدامة ألف طن رز رايعين يحرقوه، وقف أعضاء الاتحاد الاشتراكى بتوع قسم أول بما فيهم واحدة ست، وقفوا وحاشوا يدافعوا عن الألف طن رز اللى داخلين ومصرين لازم يحرقوه! العملية اتجهت للتخريب لدرجة إنه حتى لما حصلت الإصابات الأربعة دول، وروحنا إحنا يومها بالذات وداخلين بعد الفطار ونشوف البلد مشدودة لأن فيها ٤ قتلى! وأقل شئ الطلبة ماشيين والسنات والرجالة ماشيين عادى جدا فى الشارع قدام الحنة اللى حصل فيها المعركة كلها قدام مديرية الأمن.. كل شئ ماشى طبيعى وعادى واستتكار الناس للعملية. قالوا: عملية التخريب بالذات مش مقبولة، وبعدين المعهد الدينى مالمهش ولا ناقة ولا جمل فى العملية بتاعة حتى التربية والتعليم.. يعنى هى عملية تخريب.

سرى للغاية

الحقيقة بالنسبة للمنصورة، واضح تماما إنه الولاد الطلبة بالذات من عملية فبراير راكبين راسهم؛ لأن احنا مثلا وإحنا هناك جولنا بتوع اتحاد الطلبة علشان يشوفوا الحالة إيه، لكن الشعب هناك مثلا الشعب هناك بأكمله ناغم على العملية دى ويقول: إن ده كلام لعب عيال ولا يمكن المسائل تمشى بالشكل ده؛ لأنه بيخوشوا والناس بقيت تروح تجيب عيالها من المظاهرة لأن بيروحوا يطلعوا المدارس ويطلعوا العيال الصغيرة وبيأخدوهم فى رجليهم، وحتى راحوا كمان علشان يطلعوا مدارس البنات وضربوا مدرسة البنات! محدش يقبل أبدا إنه الناس تطلع وتمشى فى الشارع وبالشكل الللى كانوا عايزين يعملوه دا.

يعنى الحقيقة المحافظ فى المنصورة بذل هو وأمين الاتحاد الاشتراكى أقصى ما يمكن من مجهود؛ لدرجة إن الناس يعنى الكل حتى اتحاد الطلبة فرع المنصورة ذاته بيقول: إن المحافظ وأمين الاتحاد الاشتراكى موقفهم هو الوحيد الللى الجميع بيعترف بيه سواء كان الطلبة أو الشعب أو الناس كلها. بذلوا أقصى ما يمكن، لكن فى تقديرى إنهم غطائين لأنه مكانش يجب الصبح فى المظاهرة لتانى يوم إنها تمشى أبدا ولا خمس دقائق حتى! وقلت هذا الكلام للمحافظ قدام لجان الاتحاد الاشتراكى.

الحقيقة لجان الاتحاد الاشتراكى، لجنة المحافظة ولجنة قسم أول ولجنة قسم ثانى عملنا اجتماع طويل أنا وعبد المحسن خدنا بييجى ساعتين.

الناس بيقولوا: ياإما فيه حكومة أو مفيش حكومة! وبالطريقة الللى ماشية الأمور بيها بالشكل ده الناس بتحس إنه مفيش حكومة إطلاقا؛ وده لا يجب إنه يمشى أو يسير وأى قرار حتى ولو غلط يصدر لا يجب أن نتراجع فيه؛ لأنه المسألة بقت مسألة.. هل موجود حكم ولا مش موجود حكم؟! جمعنا اللجنة المركزية هناك الللى فى الدقهلية، والصورة كاملة قدامهم وهم نفسهم شايفين الصورة علشان يحكوا تفاصيل الللى الناس بتحس بيه والللى الناس بتعرفه وطالباه هناك. بالنسبة للحادث الللى جرى ٤ قتلى فى المنصورة ليس له أى تأثير!

أنا بقول إن الللى جرى ده كله فيه حد وراه، ليه؟ لأن يعنى أنا أفهم إنه يطلع من المنصورة تأثير شعبى يعنى فيه صدى شعبى جوه المنصورة وينعكس هذا الصدى على بقية الجمهورية؛ الدنيا مشيت مفيش صدى شعبى إطلاقا جوه المنصورة لهذا الموضوع، إلا بالاستنكار الحقيقة لعملية البلطجة الللى حصلت هناك عندهم. لا.. وبيعتبروها عملية بلطجة كمان حتى عمال الأتوبيس يعنى كانوا رايعين يحرقوا الرز، وكانوا داخليين على محطة شمال الدلتا هناك محطة مليانة أتوبيسات علشان يحرقوها!

سرى للغاية

ووقفوا لهم العمال على الباب ومنعواهم يعملوا أى حاجة أو ينالوا أى شئ من أى أتوبيس.. فعملية بلطجة وتخريب يعنى.

فأنا بقول: فيه عقل وراء هذه العملية لأن مفيش صدى شعبى طلع من المنصورة للعملية دى؛ ده فيه تحركات من ناس معينين اللى نقلوا الكلام ده بسرعة ونقلوه بالصورة اللى عايزينها علشان يعملوا تحرك فى بقية الجمهورية كلها. ده باختصار موضوع المنصورة.

شقىر: يافندم بالنسبة لإسكندرية، قبل إسكندرية هاشير لحاجة خاصة بالمنصورة، الواحد شاعر إنه كان من بدرى ظهرت ٣ مرات فى مراكز إعداد الفنانين عندهم حالة زمزأة على طول. كان واضح إن فيه نشاط شغال بشكل أو بآخر، وبالذات إن المركز بيقى على صلة بإسكندرية لأن بعض طلبة مركز التدريب بتاع المنصورة بيذهب مرة فى الأسبوع الى الإسكندرية. عايز أقول برضه إن فيه بين المنصورة وإسكندرية صلة.. فيه بعض طلبة كلية الهندسة بالذات.

هى العملية بدأت فى إسكندرية يافندم يوم السبت، إحنا يوم الخميس بدأت العملية فى المنصورة عملنا اتصلنا السبت والخميس والجمعة، ويوم السبت بدأنا بداية كويسة أوى فى القاهرة وعين شمس وفى أسيوط.

فى إسكندرية من أول يوم من أول بداية الدراسة العملية، رئيس الجامعة فى إسكندرية قال لى: بعض الطلبة فى كلية الهندسة أو معاهم بعض طلبة المنصورة عاملين اجتماع. وإن فيه ولدين فى إعدادى من المنصورة جايين وجايين بشحنة جامدة جدا ويحاولوا يهيجوا الطلبة، والعميد والوكيل وعدد من الأساتذة وإذا موصلوش معاهم لشيء أنا نازل أنا بنفسى. وبعدين إتحرك بعد شوية د. بغدادى وقبل ما يمشى بشوية قال لى: أنا نازل وراح اتصل وقعد معاهم وبعد شوية راح المحافظ.

لم ينجحوا مع الأولاد فى شئ، طول المدة دى والأولاد مصرين وكان كلامهم سخيف ومعاملتهم بايخة، وبعدين طلخوا بمظاهرة بره علشان يمشوا، راحوا كلية الزراعة وبعد ما راحوا كلية الزراعة رجعوا تانى الى المبنى مبنى كلية التجارة، وهم متواجدين البوليس اعترض وفرقهم، بالتفرقة رجعوا تانى جري على كلية الهندسة.

رجعوا على طول يافندم على الكلية وراح لهم تانى المحافظ ومدير الجامعة، وتانى مرة لما راح كان الولاد فى منتهى قلة الأدب لأن فى دخول المحافظ ومدير الجامعة فيه أوضة بتاع حرس على الباب؛ فهم وهم داخلين العميد من الزحمة دخلهم معاه، الولاد وقفوا فى شكل فسر إنه احتجاج المحافظ والمدير! لحد لما زملائهم اللى فى الشارع اتمسكوا، كانوا ٦ أو ٤ من زملائهم كانوا ممسوكين.

سرى للغاية

وبعدين زملائهم رجولهم والمدير والمحافظ قعدوا معاهم وظلوا مجتمعين بيهم حتى المغرب وحتى المغرب، إبتلور بالكلام بتاعهم ٩ مطالب ملخصها:

١- بيتصدرها إقالة شعراوى جمعة.

٢- التحقيق فى حوادث المنصورة، وهنا كلمة التحقيق هنشوفها وهتيجى فى كلام فى حنت

ثانية.

٣- الاشتراك فى عملية تطوير التعليم فى كل المستويات سواء فى ثانوى أو فى الجامعة أو

غيره.

٤- استتكار العمليات اللى تمت فى المنصورة بالذات.

٥- كلام عن رفع رقابة أو وصاية وزارة الإرشاد على الصحف.

٦- جعل التغيير ليس مجرد شعارات ولكن حقيقة.

٧- والكلام بتاع الحريات.. قانون الحريات.

ودى المطالب التسعة بالشكل العام، وناقش معاهم المدير والمحافظ قالوا لهم: ده كلام مش

معقول! وسابوهم المغرب ونزلوا، وعلى بالليل الولاد ابتدوا بيقوا أنشط وبعوتوا وفد يقابل المحافظ بكلام تانى فى الموضوع.

المحافظ قال لهم: لا يمكن الكلام ده.. ماحناش هناخد به!

المظهر.. الحاجة الملفتة للنظر يوم السبت بالليل ٣ مظاهر: إن عدد منهم نزل يوزع

منشورات فى السكك فى العرييات وفى الأتوبيسات واتمسك عدد من الأولاد منهم.

الحاجة الثانية: إن عدد منهم نزل أجروا اتصال بجامعة القاهرة والجامعات اللى فى القاهرة

بشكل عام.

الحاجة الثالثة: بس دى أنا معنديش أسماء أو حاجة عنها، إن بعض منهم إبتدى يتصل

بالسفرء الأجانب فى الإسكندرية. وهنا الرواية بشكلين..

رواية: إن دول طلبة وافدين رايحين لسفاراتهم.

ورواية ثانية: إن دول طلبة عاديين رايحين بالمنشورات اللى طبعوها للسفارات.

سرى للغاية

أيضاً بدأت بعض اتحادات الكليات غير كلية الهندسة تطبع نفس الكلام وتوزعه؛ زى كلية الزراعة وزى كلية الطب فى إسكندرية! ده بالنسبة لإسكندرية لحد يوم السبت بالليل. هارجع للقاهرة، يوم السبت القاهرة مشيت الدراسة كاملة لحد الساعة واحدة وشوية اجتمعوا طلبة الهندسة وقعدوا، وكانوا حوالى ١٠٠٠ مجتمعين وكان متزعم الاجتماع فريد حسنين ومكاوى. والحقيقة فريد حسنين ومكاوى برغم إن أنا شخصياً مبنقش فيهم، إنما فى هذا الاجتماع بالذات بذلوا جهد كبير جداً فى الكلام مع الأولاد وكان موقفهم مختلف عن الموقف العام بتاعهم طول الفترة الماضية، ونجحوا فى إن ٨٠٠ ولد يطلعوا لكن فضل ٢٠٠ ولد من أرزل الطلبة الللى موجودين وأغلبيتهم عملوا مشاكل.

لكن كانوا عاملين trick غريبة شوية، إن طيب إحنا هنطلع بيان متعلق بالحوادث بتاع المنصورة، إذا كان حدث تغيير فعلاً يبقى هينشر فى الصحف، إذا مكانش حدث تغيير وحرية الصحافة مكبوتة يبقى إحنا بكره هنجتمع الساعة ١٠ هنا كلجنة للمتابعة.. متابعة العملية.

فى الوقت ده الحقيقة درسنا الموضوع مع السيد وزير التعليم العالى والسيد عبد المحسن وشعرواى وبدأنا نشوف الوضع؛ كان من رأىى وتقريباً كلنا ضرورة وقف الدراسة فى الجامعات على طول كلها. هو كان رأىى رأيين.. فكرة إنه نوقف فى إسكندرية بس، وكان فيه فكرة إن ناخذ كل الجامعات ونوقفها.

وبعدين فى المناقشة الحقيقة تبين رأىى الثانى هو الحقيقة أكثر ملائمة؛ على أساس إن لو الدراسة موقفتش فى القاهرة وعين شمس كل النشاط هيتحول لهنأ، وبعدين هنضطر نصطدم اصطدام كبير جداً والأولاد هيروح ضحايا منهم كثير من الاصطدام.. هانجح فى منع المظاهرات لكن هتبقى الضحايا كثيرين!

عقبال ما اجتمع المديرين وجم كان القرار بقى الساعة ٢,٣٠، كان فيه احتمال إنه يذاع فى آخر الراديو الللى هى قبل ما بيشطب، إنما قلنا نستنى لـ ٦ الصبح علشان الأولاد الللى كانوا فى المدن الجامعية والأولاد الللى معتصمين فى إسكندرية ميعرفوهاش بالليل، ويعملوا عمليات بالليل حرق مدينة أو حاجة قد لا نكون استعدادنا لها.

سرى للغاية

طلعت الكردونات على الجامعات ومشيت، تانى يوم فى القاهرة تجمع عدد من الولاد اللى كانوا جايين يحضروا الدراسة اللى معروفش، وبعدين وقفوا تساءلوا وبعد هذا البوليس صدهم ومشاهم. والأولاد ملاحظتهم إن البوليس المرة دى كان أكثر تدريبا وأكثر مهارة فى معالجتهم من المرة الماضية، بيقولوا كان فيه اجتماع مع الأخ ضياء مع جزء منهم، وبيقولوا: البوليس بينفض وبيتحرك بقوة ودراية أزيد من اللى كانت فى فبراير.

فى إسكندرية فى هذا الوقت مازالوا مصرين مع تغيير إن الميكرفون كان فى أيديهم وكانوا بيقولوا مطالبهم، بيحاولوا يوجهوا كلام للعمال بالذات من خلال هذا الميكرفون اللى بيطل على منطقة مزدحمة بالناس، وفضلت برضه محاولات معاهم إنهم يخرجوا.. مفيش!

الكردون كان فى الكلية متشعبة خالص ومتفرقة، ومنظر الكردون مامنعش عدد من الدخول والخروج فبقت فيه أعداد للدخول، بالشكل العام العدد كان بيزيد وبيقبل، لكن على آخر النهار بشكل عام العدد كان ابتدى ينخفض وينزل لحوالى ٣٠٠ أو ٤٥٠.

برضه لحد بالليل إمبراح العملية مكانتش مجدية معاهم، وكان فيه فكرة بالليل إن العدد لو نزل لـ ١٠٠ أو ١٥٠، إن البوليس يدخل بالليل يفض العملية وينهيها علشان متستمرش الحتة دى فى إسكندرية؛ لأنها عاملة زى مركز عمال بيغذى فى كل إسكندرية بشكل عام. لكن علشان العمليات تتم البوليس ابتدى يتجمع.. الحقيقة تجميع البوليس كان لتقوية الكردون لكن لما شافوا الولاد البوليس عمال بيتجمع، استنتجوا إن البوليس بيستعد علشان يدخل لهم.

فهم من جوه بدأوا يستعدوا، مسكوا حتة خشب ويقال إنهم ملوا أزايز كوكاكولا رمل والكلام ده؛ فالبوليس أجل الموضوع ده إمبراح.

النهارده كان فيه حوادث فى المدينة، وعندهم نزل من الصبح ٤٠ عضو من أعضاء هيئة التدريس فى وسطهم، فيه محاولة شديدة للتركيز عليهم للخروج؛ المحاولة ماثمرتش لحد الساعة ١ مكانش فيه أى إثمار للمحاولة، وإن الأول مطالبنا التسعة.. الى آخره.

لكن لما ابتدى الهليكوبتر يشتغل وابتدى الإنذار بتاع أحمد كامل.. إدالهم إنذار، وبعد ساعتين الحقيقة ابتدى شوية أعصابهم تنهز؛ الهليكوبتر معناها إن الجيش هيدخل! فى اللحظة دى مدير أمن إسكندرية يبدو استدعى لبعض العساكر الموجودين والكردون اختل شوية أو ضعف شوية؛ فعدد دخل يختلف تقديرى دخول العدد ما بين ١٢٠٠ و ٢٠٠٠ طالب، فيه بعضهم طلبة ثانوى إنما الغالبية طلبة جامعة إنما فيه منهم طلبة ثانوى وناس تانية من خارج الجامعة.

سرى للغاية

على المغرب ابتدئ الوضع فى الحقيقة يتغير شوية، واتصلنا بالجامعة برضه وقالوا لى: إن العدد ابتدئ ينزل.. البعض كان بيقول نزل لـ ٧٠٠ والبعض بيقول نزل لـ ١١٠٠؛ مما يدل فيه عدد كبير طلع من الطلبة.

بعد المغرب اتصلت تانى بالدكتور بغدادى، فقال: إن الأساتذة محاولة أخيرة رايعين لهم يطلعوهم علشان ميحدثش اصطدام، وبعدين نبقى نعمل اللى احنا عايزينه فيهم. بيدو اللى باين لسيادتك دلوقتى اللى هو نجاحهم فى إخراجهم.

عبد الناصر: هو قبل ما يطلعوا كان مطالبهم بدل تسع مطالب كانت مطلب واحد إنهم يضمنا مستقبلهم، وقعد يترجى أحمد كامل ويتكلم معاه فى التليفون ويتاع وأحمد كامل صده.

شقيق: هو أنا يافندم بعد الظهر قومت حلمى نهنوش ومحمد ناظر وإدينالهم عربية من الاتحاد الاشتراكى.. حلمى نهنوش ليه تأثير على الشاطر، وأنا قلت إن هى دى محاولة أخيرة إن كان له تأثير؛ الشاطر وحش أوى سيئ يعنى.

حلمى نهنوش ماشى فى خط سليم وكويس ومن أسلمهم، والسنة اللى فاتت عمل حادثة غش واترجوا ويتاع، وإحنا سيبنا الموضوع على أساس إن بعد هذا هنشيله خالص شيلان تام، وحادثة الغش معانا وفى إيدينا.

إنما حتى هو تفسير سلوكه غريب، إنه كان مع رئيس اتحاد الجمهورية طالع داخل لكى يتحدث لمنع المظاهرة، وبدأ الحديث بهذا الشكل وبعدين لما طلعت المظاهرة ياخدكم لحد كلية الزراعة ويرجعهم تانى لجوه! ما عرفش هل هذا الكلام تمويه على رئيس الاتحاد وإلا الكلام ده يقصده؟! إنما على أى حال بعد المظاهرة ما طلعت وتبين إنها هتمشى تزعم المظاهرة وبعدين فضل فى الداخل. أنا قلت لهم: حلمى نهنوش ومحمد ناظر معرفش كلموه ولاّ لأ؟ وأنا وصلت لملاحظتين هنا مهمين..

الملاحظة الأولى: إن ما وجدش سبب يدى العمليات دى كلها، لكن لما آجى أبص إذا كان أول يوم طلبة المنصورة بتوع المدارس هم اللى قاموا بالعملية أفهم إن يبقى فيه سبب مباشر، لكن بعد توضيح وزير التعليم خلاص انتهى السبب وخلص!

سرى للغاية

أبو النور: سامعين راح لهم المنصورة وقال لهم: أنا جاى من المنصورة وشفت وعاصرت العملية من أولها
لآخرها وبحكى لكم!

شقير: لكن بعد العملية بتاعة يوم الأربعاء مفيش أى سبب، لهذا فهي الحقيقة إستغلال مناسبة معينة يعنى
افتعال أو التقاط مناسبة واستغلالها سياسيا.
النقطة الثانية: هي إن أنا عايز أقول محاولات تحريك العمال وصفوفهم من الطلبة بتوع كلية
الهندسة.

دول الناحيتين الحقيقة.. السرعة اللي تمت بها العملية والشكل اللي وراء بعضه ومحاولة
التضخيم.

عبد الناصر: الجدع اللي معاهم ده اللي كان متزعم، يعنى بيتهياىلى هو اللي كان متزعم العملية كلها عصمت زياد
الدين.

شقير: وهو له تأثير عليهم! اللي أنا عايز أقوله برضه يافندم: إن النقطة بتاعة دكتور فايق بتاع كلية آداب
عين شمس، كان ممكن أن تستغل ولكن إحنا نزلنا التفسير بتاعها.

عبد الناصر: يعنى ليها معنى، بتوع كلية آداب علشان الدكتور فايق، وبعدين يقول لهم: لأ.. مش مصدقين!
ووزير العدل والنائب العام ومش عارف إيه وراح العميد ومعاه طلبة وبتاع!
العملية الحقيقة بقت عمليات لا تطاق!

شقير: دى يافندم الصورة.

عبد الناصر: هو الحقيقة فيه اختلاف كبير ما بين فبراير ودلوقتي؛ معنويات الجيش كانت تعبانة جدا الحقيقة فى
فبراير اللي فات، والواحد كان يتردد إنه يطلب من الجيش يتدخل. يعنى هم كانوا حاسين إنهم عاملين
عاملة.. القوات المسلحة كلها حاسة إنها عاملة عاملة يعنى كانوا مش عمليين فى وقتها؛ ده لأن
شعراوى طول وبتاع على أساس إنى لا يمكن أدخل الجيش فى العملية لأن كانوا متضايقين جدا.

سرى للغاية

وبعدين حصل هتافات ضدهم، ونزل لهم أمر إنهم ما يطلعوش بره القشلاقات! فكان الوضع يعنى.. دلوقتى الوضع فى القوات المسلحة إختلف.. يعنى الروح المعنوية اختلفت، التسليح اختلف، وبعدين كان فيه هنا قوات؟! مكانش فيه قوات هنا! بقى فيه هنا فى القاهرة قوات وفى إسكندرية.. إسكندرية فيها ٣ فرق والقاهرة فيها فرقتين، الجبهة مليانة وبعدين يعنى إن أنا متأكد إن مش هيعجبهم الحالة لأنهم بيعتبروها طعنة فى ظهرهم!

والجيش فى مناقشاتى معاهم مش موافقين على حل سلمى، ولو إن أنا بقول لهم: إذا كان فيه حل سلمى يبقى أنا هاعمله غصب عنكم! العملية ماهياش الحرب من أجل الحرب أبدا.

الوضع النهارده كان يسمح والواحد مستريح باشيل التليفون وأقول للجيش: إنزل، وإتفضل يعنى أعمل control على إسكندرية وجهاز نفسك للقاهرة! فهو الحقيقة الوضع كان كده بصراحة.

وأنا بيتهىألى إن البلد تحت الـ impression لأن النظام مهواش نظام.. الاتحاد الاشتراكى برضه لازال الاتحاد الاشتراكى قش ده كلام يعنى! ولا لجنة مركزية! لأن النظام ولعشر سنين جاية قائم على الجيش.. ده يعنى الحقيقة موضوع لا ننكره.

لأن اللجنة التنفيذية مين؟ مش فاهم مين المسؤول؟! كلام قلة حياء ومحصلش تغيير! وعارفين يعنى الكلام اللى حصل.

الحقيقة النهارده أول ما نزل الجيش فى إسكندرية، حصل تغيير كبير علنا بإن هو مانزلش الشارع ولا اتحرك غير كتيبتين؛ قلت لهم: كتيبة هنا وكتيبة هنا، وطلعوا الهليكوبتر وراحوا وصوروا كلية الهندسة فعلا على أساس إنهم هيشتركوا فى العملية بالليل مع شعراوى كاحتياطى له. والهليكوبتر كان بيبلغ واللاسكى التجمعات فى الكلام ده، وبعديها على طول بنصف ساعة ابتدئ الطلاب يمشوا من كلية الهندسة!

الحقيقة برضه أنا قلت له: إن بكره الصبح ينزل الجيش لأن ممكن العدو.. لازم هاننشر الحقيقة ومش هانقدر ماننشرش؛ لأن طبعا الموضوع الدنيا كلها عارفة الموضوع.. الصحافة كلها عارفاه وإسكندرية كلها عارفاه والسفارات كلها عارفاه! هاننشر بما يقرب الناس عليهم.. هو يتكلم على أزمة المواصلات.. بيوروهم الأتوبيسات! وبعدين أنا قلت لحلمى وهو بيقل مدارس إسكندرية بيقى معاه بوليس النجدة - مدارس الثانوى - لأن باين إذا كان حد وراء العمليات دى كان مرتب على إسكندرية مش على القاهرة.

سرى للغاية

السادات: بالذات على إسكندرية.

أبو النور: حطوا خطة على أساس إن العمال جزء منهم والوردية طالعة تندى فى وسط العمال على أساس إنهم عمال والعملية تمشى؛ واضح لأن الترتيب متمركز فى إسكندرية على إنه يوسع.

داوود: اللى أنا بقوله يافندم: لازم نستفيد من تحرك الرأى العام ضد الطلبة؛ فى القاهرة واضحة قوى حتى فى الأنوبيسات بيشتمو الأولاد فلانم نستفيد من هذا.

عبد الناصر: الحقيقة طبعا فيه أسباب لهذه العملية الحقيقة بتبقى سماد ومعامل تفريخ، الفرق برضه بين ٦١ و ٦٢ و ٦٣ والنهارده على الناس كبير قوى! تقريبا كنا بندى التلفزيون ببلاش.. التلفزيون ب ٦٠ جنيه والعربية ب ٧٠٠ جنيه مش فاهم إيه بايه والكلام ده!

الحقيقة الإجراءات اللى اتخذت بعد كده من ٦٥ لغاية النهارده حاطة عبء على الناس، حتى قانون الدمغة اللى طلع قانون بايخ جدا ومحدث بيفكر سياسة! كان حد جابلى القانون ده وأنا مضيته من غير ما أقره مش عارف مين؟!

الشافعى: وكان بيتنفذ على الموظفين وكان العمال جزء وبقي إنتفذ جزء.

عبد الناصر: هو يظهر جالى به حسين مضيته من غير ما..

الشافعى: بقاله ٤ أشهر مفيش حصيلة والإنفاق زاد والمطالب بتتزايد.

عبد الناصر: هم بيدوا الموظفين سلفة شهرين وبعدين بيحى يقول لك فيه تضخم! بعدين يقول لك: أدى سلفة شهرين! فالعملية الحقيقة سألتهم.. إزاي عملتوا كده؟! قالوا لى إحنا خدنا قرار فى اللجنة الاقتصادية بالكلام ده!

سرى للغاية

التنمية السنة اللي فاتت واللى قبلها صفر.. صفر.. مفيش حاجة يعنى! واللى قبلها من ٦,٥ الى ٨,٥٪، وبعدين العربيات بالعملة الصعبة! والشقق النهارده فيها عندك شقق فاضية ومحدث بيشتري؛ لأنها ورايا وأنا بعدى عليها وشايف العمارات متقللة وفاضية! وبعدين فيه حتى مساكن فى حلوان فاضية، وبيقولوا الواحد يشتري الشقة وبعدين فيه عمارات بيقول لك إشتريها بالعملة الصعبة! الحقيقة يعنى إحنا كفرنا الناس لحد كبير!

بيقول لك: فيه تضخم، والجلسة اللي فاتت بيقولوا لى: فيه تضخم وطبعاً وزير التخطيط بيقول: فيه إنكماش، وهم عايزين يمسكوه ويقطعوا له رقبتة! (ضحك)

استينو: فيه كساد.. فيه بضع السلع الناس مابتشتريش!

عبد الناصر: الحقيقة السياسة اللي كان ماشى بيها زكريا محى الدين وقتت الدنيا كلها! حتى النهارده علشان تزق تمام زى الأتوبيس اللي بيقولوا: بيشتغل بالجاز ده ومافيهش مارش، إذا وقف مبيدورش بيخلوا المكينة دايرة طول الليل!

النهارده علشان تزق فى الصناعة.. وبعدين الاتفاقيات اللي مع روسيا إتلغت! مع بولندا إتلغت! واللى مع الكتلة الشرقية إتلغت! والنهارده كان عندى عزيز وكننت باتكلم معاه إن لازم نمشى فى الصناعة علشان هى السبيل الوحيد.

وبعدين استصلاح الأراضى يبقى من ١٢٠,٠٠٠ فدان الى ٣٠,٠٠٠ فدان! والنهارده تقريبا شركات الإسكان هتفلس كلها، وبيقول لك: وهنجيب حديد تسليح وده بيساوى ٧٪ وعبء على العملة الصعبة! وبعدين مصنع السيارات وقف، دلوقتى النهارده عايزين يشغلوه ورديتين؛ لأن المواصلات طلبت أتوبيسات وهو بينتج بقدرته كلها. فالحقيقة العمليات دى كلها عايزة نظرة ومحدث بيفكر سياسيا فى هذه الأمور.

ثانيا: هل العمليات دى جابت ربح؟ هل بتعدى ١٥٠ مليون جنيه؟

صوت: لأ.. ماجبتش!

سرى للغاية

عبد الناصر: الواحد بيحكى إنها جابت، لكن بنحسب على أساس نخلى دخل الحكومة زى ماهو، لكن فى رأى فيه حاجات.. فيه مخزون دلوقتى؛ الثلاثجات مثلا، العربية اللي كانت بـ ٧٠٠ جنيه النهارده بـ ٢٢٠٠ اللي هى العربية الـ ١٠٠٠، والتلفزيون بقى بـ ١٤٠ و ١٥٠ و ١٦٠، وكان بيتاع بـ ٦٠! وبعدين برضه إتأثر بهذا بتوع المواد شوية.. حاجات الأكل وبتاع، والمكواة غليت وحتى بتوع القهاوى! يعنى فيه سبب فى هذا والناس بيقتدوا.. وبرضه فيه أزمة المواصلات فى الإسكندرية برضه بنكسر الناس! وبعدين لما روحت أناقش أزمة المواصلات فى مجلس الوزراء رسيوا كلهم على إن مفيش داعى نعمل حاجة! وفى الآخر بقى الواحد سأل.. هل الأتوبيسات الموجودة تستوعب الناس ولا متستوعبش الناس؟!!

ولكن يطلع يتكلم صدقى ويتكلم حجازى على أساس يعنى الحوافز وبتاع، وكلام لا بيودى ولا يجيب! العملية إن لازم نجيب أتوبيسات، ولازم الحقيقة هى دى المواضيع اللي لازم سياسيا نحصرها، وبرضه بالنسبة للتعاون.. التعاون بايظ فيه سرقة والكلام ده! معنى هذا إن الحكم مش موجود! اللوائح الحقيقة كل العمليات دى لازم تمشى؛ لأن ده الحقيقة بيبقى أسباب لأن الناس تبقى تعبانة.. فلازم نشيل تعب الناس ده فييجى بعد كده الحقيقة نتكلم على الظاهرة الموجودة الحقيقة.

يعنى هو إحنا السنة اللي فاتت معتقلناش بعد العدوان، إعتقلنا الطلبة وسبيناهم وبعد كده لم نعتقل وقلنا: ده نحلّه بالعمل السياسى. إعتقلنا ٣ بس اللي هو إنتو قتلوا عليهم فى المجلس، وبعد كده مفيش اعتقالات خالص. اللي بيتكلم واللى بيشتم - أنا بشوف كله - كنا زمان اللي كده بيعتقل، بيتحقق معاه بيروح النيابة بيروح المحكمة، وكل واحد عارف إنه اللي هيعمل حاجة هيخسر خسائر رهيبية!

النهارده مفيش لا اعتقالات ولا حبس الحقيقة، بل بالعكس احنا المعتقلين طلعا عدد كبير، كنا فى المؤتمر قلنا: فاضل ٨٠٠، أظن النهارده فاضل ٤٠٠ أو حاجة.

ييجى بقى موضوع الطلبة، الحقيقة موضوع الطلبة اللي باين فى العملية دى موضوع هيفضل باستمرار، وكان الموضوع ده معلق والواحد مستنيه ينفجر يعنى مستنيه يتلككوا على أى حاجة علشان ينفجروا. وأنا لما كنت بقرأ جرائد الحائط اللي بيكتبوها وعندى أساميهم وعندى الكلام ده كله وعاملين لهم كروت عندى فى المكتب للولاد؛ منتهى السفالة ومنتهى قلة الأدب، وبعدين ابن إيه اللي أبوه إقطاعى واللى مش فاهم إيه ولما الواحد بيدور كلهم بالشكل ده.

سرى للغاية

إذاً الحقيقة يعنى اللى أنا متصوره، إن احنا هذه الفرصة يعنى إحنا بنقلب الرأى العام كله على العملية دى، ولازم نخلص على موضوع ثورة الطلبة.. ثورة فبراير. يقولوا: "إن طلبة ٦٨ ليسوا أقل وطنية من طلبة ٤٦!" ٤٦ دول كانوا طالعين ضد الإنجليز والإنجليز ضربوهم وموتوا منهم ٩ باين. وعملية الضرب إحنا نقدر نضرب الحقيقة نضرب جامد، وبعدين إحنا القوانين عدلناها.. عايزين قانون الحريات!

يعنى أنا إمبارح بقيت ندمان إن أنا دخلت فى قانون الطوارئ التظلم والله بعد ٦ أشهر، وقلت: إنه لا يكون الحكم نافذ إلا بعد التصديق.. تحايلوا على هذا الموضوع! فالحقيقة العملية النهارده هل بنخلى الطلبة كمستودع بارود قائم فى أى وقت يعملوا.. يعنى مثلاً المدرس اللى مسكوه، ده فيه منشورات بتوزع اسمها "جماعة خير مصر" وبقي يعنى حاجة شنيعة، وتم تفتيش بيته بأمر النيابة وقبضوا عليه.

الصبح بقى مدرسين تانيين بيحروا على الطلبة وبيقولوا لهم: ده المدرس اتخطف! والطلبة بيقولوا: إحنا معتصمين عايزين نعرف إيه الموضوع! يعنى إذا لازم ننهى الحقيقة الموضوعات دى. هو أنا قلت: إن احنا بنعمل لجنة من محسن وليبيب وشعراوى وعبد العزيز والبرلسى يشوفوا العمليات دى.. إحنا عارفين الطلبة!

البرلسى إمبارح كان بيقول: الطلبة اللى عملوا حاجة هنرفدهم، لكن أنا رأيت ده مش كفاية لأن أنا عندى طلبة فى كل حنة ١٠ - ١٥ - ٢٠، هم اللى عاملين العملية. أنا رأيت إن احنا الحقيقة لازم نرفد عدد كبير من الطلبة، وياخداهم الجيش يعمل لهم معسكر وبيجندهم يعنى ويتهدبوا تهذيب كويس جدا إن شاء الله يكونوا ألف! أنا رأيت إنهم أقل من كده، وبعد كده الحقيقة الكلية اللى بتعمل حاجة بنقلها على طول، ولكن لا يمكن نفتح الكليات بعد كده إلا إذا طهرنا الطلبة والأساتذة.

إحنا عملنا كده فى سنة ٥٤، وديناهم برضه على الجيش وعملنا العملية وعملنا ترمين ومشينا الحقيقة. طبعاً الظروف النهارده بتختلف عن ٥٤ على أساس عملية حركة الطلبة العالمية، لكن طالما الحقيقة إن العملية فيها غرور وإنهم ممروعين ومحدث مالى عينهم، فلازم الحقيقة نجبرهم على هذا.. هو ده السبيل الوحيد.

فوزى: المحركين يعنى عرفناهم بالضبط؟

سرى للغاية

عبد الناصر: شوف يعنى المحركين الـ behinds، أنا مقدرش أقول مين محرك behinds لأن الطلبة اللي كانوا جوه الجامعة معروفين بالإسم النهارده.

فوزى: العناصر اللي خارج الطلبة هي اللي بتشتغل داخل الطلبة.

عبد الناصر: آه.. فيه عناصر كثيرة جدا في هذا، يعنى الإخوان مثلا مقدرش تقول مين مع الإخوان، وبعدين برضه الشيوعيين كعنصر مقدرش تقول مين مع الشيوعيين! وبعدين فيه ناس بقى اللي هم زى الدكتور بتاع كلية الآداب وزى أحمد سعيد، بيجروا وراء الطلبة على هذا الموضوع فمقدرش الحقيقة.

فوزى: واضح؟

عبد الناصر: لأ.. ده واضح يعنى مثلا أحمد سعيد بيقابل الطلبة ويقول كيت وكيت وكيت، وبيجي طالب بيلغ، أستاذ بيجمع الطلبة وعمل معاهم كيت وكيت وكيت.. فالكلام كله تحريض وكله كذب.

فوزى: الحاجة الثانية الى مدى إن الطلبة ليهم حق في الكلام بتاعهم؟ من الناحية الموضوعية وليس من ناحية الخروج على اللياقة وعلى الوحدة الوطنية؛ من ناحية أخرى شكلها مش كويس إن تفضل الجامعات مقفولة فترة طويلة.

عبد الناصر: لا.. يمكن فتح الجامعات وفيها هذه العناصر؛ يعنى إمسك مثلا كلية الهندسة الـ ٢٠٠ اللي بيقول عليهم شقير، لا يمكن أفتح كلية الهندسة وفيها الـ ٢٠٠، ولا يمكن أفتح كلية العلوم وفيها الحلوجي، ولا يمكن أفتح كلية الاقتصاد وفيها الولد ده اللي عمل الشاطر والمجموعة بتاعته، والفنون الجميلة لا يمكن أفتحها وفيها الجدع ده اللي اسمه.. راح والمجموعة بتاعته. وأنا عارفهم كلهم وعامل لهم كلهم عندي في الرئاسة كروت ويعنى بالأسامي من السنة اللي فاتت، وطبعا منتظر هيجي اليوم اللي من التقارير كلها معمولة يعنى متجهزة العملية، بالنسبة للأساتذة عندي وكل الأساتذة والحراسة واللى إقطاعي واللى اتكلم واللى عمل.. كل دي الحقيقة عملية!

سرى للغاية

فوزى: مادام عندنا المعلومات كفاية أو قريبة من الكفاية خلاص انتهى الموضوع، وبعدين المقارنات مع الخارج دايما هتكون مذكورة بينا وبين الخارج.

عبد الناصر: هو النهارده أحمد كامل قال لى، هو قال له: طب طمنى على نفسى! قال له: أطمئك؟! ده إنت روحت بيت الرئيس وقعدت معاه!

فوزى: آه.. طمنى على نفسى مش على الجماعة الللى معاه!

عبد الناصر: آه.. وقعد يقول له: إترطت، وابتدى يتكلم على نفسه بعد ما شتمه أحمد كامل! طلبه ثانوى اشتركوا، وبعدين هذا القانون من دون القوانين كلها ٣ أشهر، وبعدين مجلس الوزراء أنا شفته أول مرة وقلت لهم روحو بيه اللجنة المركزية وبعدين أجلته وبحث فى مجلس الوزراء مرتين.. هذا القانون بحث مرتين.

فوزى: هى مستويات محدودة من الطلبة مش كل المستويات. بدى أذكر ما حدث فى فرنسا وفكرة التلاقى الللى عملوها..

عبد الناصر: إحنا عندنا اتحادات.

شقيير: إشتراكوا فى عمل اللائحة بتاعة الانتخابات، لكن الللى أنا عايز أقوله يافندم: فى فرنسا نظام أحكام مركزى جءا، النظام الللى وصلوا له النهارده هو نظام جامعاتنا إحنا؛ أخذوا فكرة المجلس الأعلى للجامعات زى الللى عندنا إحنا، كان الللى عندهم الجامعات تدار بواسطة وزارة التعليم العالى مش من الجامعات.

بالنسبة لللائحة الانتخابات، أقول لسيادتك هم الللى وضعوها، أنا كان دورى فيها الصياغة وأفكارهم كلها احترمانها وصغناها وطلعناها؛ ففيه تلاقى حادث إنما يعنى هل التلاقى ده..

فوزى: هل ما حدث هو انفعال فورى أو تراكم انفعالات وانفعالات خاطئة أو مسيئة؟

سرى للغاية

عبد الناصر: بدى أقول لك حاجة: فى الصيف لاحظ فى جرايد لبنان، إنجلترا بيقولوا: إن الخريف فى خطر! بهذا الشكل، وإن الطلبة هيعملوا والطلبة هيسوا وكذا وإن إتأجلت الدراسة؛ إشمعنى مركزين على هذا الموضوع؟! تبص تلاقى فى لبنان جريدة الحياة ومش فاهم إيه!

وبرضه التركيز على زكريا محى الدين، وبعدين الدراسة ابتدت ومشيت عادى والحقيقة الواحد كان متتبع يوم بيوم من اللى بيحصل، وشايف إن الأولاد فيهم مجموعة إتغرت وركبها الغرور ومايملاش عينها حد! وشعر إن محدش هيقدر عليها إلا قوة جبارة اللى هى قوة التهديد بالطلبة والإضراب ومستتئين أى فرصة علشان يعملوا.

وفيه مجموعة فاقدة! فيه بيقولوا: إن حركة أو انتفاضة الطلبة اللى حصلت فى فبراير عايزين يثبتوا وجودهم! ده موضوع. فكان لازم فى أول فرصة يحصل اللى حصل بأى سبب من الأسباب فجه سبب ومشيت العملية؛ أنا الحقيقة ماكنتش عايز أقفل الجامعة كنت عايز أضربهم. كنت عايز أفتح الجامعة وأطلعهم وأضربهم.. وأضربهم يعنى كويس جدا، لغاية بقى بالليل الساعة ١ كلمت شعراوى وكلمت لبيب!

ولكن أنا الحقيقة أقرأ اللى كاتبينه وبدى أفهمهم إن الدولة أقوى منهم، طلبت شعراوى وقلت له: لازم تطلع بالسلاح، ومن أول دقيقة استخدام السلاح وبلاش الضرب فى الرأس الضرب فى الرجلين. وأنا عارف الرش صوته بيخلى الناس تجرى، أما العصايا بالنسبة لقوتنا فهى قاصرة جدا فهى قريبة جدا لأن المدى بتاعها.. والطوبة أحسن منها! والعساكر حتى أيام مظاهراتنا كانوا بيسيبيوا العصاية ويضربونا بالطوب؛ لأنه مايقدرش يطولنى بالعصاية وأنا بقدر أطوله بالطوب! وبعدين واحدة ونصف إتكلت، وبعد ما إتكلت تقفل الجامعة بس مش هنتفتحها إلا لما العملية يعنى.. وإن شاء الله نقعد طول العمر وبعدين نفتحها!

فوزى: أعمال لا تليق من أى فئة تطلع فى وقت فيه معركة ونواجه عدو وأراضينا محتلة والعالم باصص لنا ويحصل هذا!

عبد الناصر: وبعدين هو الحقيقة أصله بيجى الكلام من مصدر واحد، ثم لمصادر متعددة ثم يهيا للإنسان إنه ييجى من عدة مصادر مختلفة؛ الحقيقة بيبقى ده هو اللى قايل لده وقايل لده وقايل لده! أنا بعثت كلمت هيكل وقلت له يشوف ويسأل فى المنصورة مراسل الأهرام ويبعث بعثة الى المنصورة، والكلام محصلش!

سرى للغاية

يعنى أمريكا كلهم يعنى ناس.. يعنى واحد يقول لواحد كده مثلا على الجدع اللي قال لفريد حسنين: أنا حر إن شاء الله أقول أنا حر دى حريتى حرية رأبى معلش واحد يقول لواحد، أما واحد شايلينه أعمى بيقول: "أقبل.. أقبل ياديان!" مش ممكن يعنى.

داوود: سألته وقال لى عليه، قلت له الراجل ده إحنا واخدينه.

عبد الناصر: هل هو شاف بنفسه؟

الموضوع الثانى: هو طبعا هناك الإسلوب الإدارى، وطبعا هناك أساليب أخرى وأنا فى رأبى الواحد فكر فى فكرة ولسه مارسيش عليها..
يقول إن احنا نقدر، يعنى النهارده مثلا اتحاد الطلبة عامل بيان، أول حاجة إستتكار للى عمله الطلبة، وبعدين طبعا إستتكار الشرطة وكاتب يعنى البيان الواحد بيجهده كويس، لكن بعدين بنقول: الإفراج عن كذا ومش فاهم إيه!
يعنى الواحد بيقول: لازم نعزل الطلبة عن البلد خالص، وهنخلص على الطبقة تخليص كامل بالسياسة.

فتفكرى فى هذا لسه الحقيقة ولكن عندى خطوط بالنسبة لبلدنا، عملية اللجنة التنفيذية اجتمعت وخذت قرارات الحقيقة مامشيتش مع الناس!
وبعدين حتى بالنسبة للجنة المركزية، أيضا نفس الطريقة بالنسبة للجنة المركزية البلد مش مشتركة معنا مع اللجنة المركزية زى ما كانت مشتركة معنا فى المؤتمر.
فكرى بنعمل مؤتمر قومى الجمعة الجاية فيه طلبية وفيه أساتذة وفيه كل الناس، وبنحط القضية بهذا الشكل وقضية المعركة وقضية البلد وأدى اللى حصل كذا وكذا وكذا، يبقى فاضل الطلبة يتكلموا. أنا هخلى الطلبة أما هيتكلموا العملية اللى أنا بعملها فى الصحافه هيبقوا فى موقف دفاعى فى العملية ويبقوا متهمين.

هيقف لبيب بيتكلم وعبد المحسن بيتكلم اللى شافه واللى حصل؛ يتكلموا هم أعضاء فى المؤتمر وأمناء الاتحاد الاشتراكى يقوموا يتكلموا ووزير التربية يتكلم، ووزير الداخلية.. الى آخر هذا الموضوع.

يعنى بنعمل عملية الأول ونحطها فى التلفزيون على أساس البيانات اللى هنتقال فى الأول؛ يعنى أنا باتكلم الأول وأخش فى جانب الكلام يعنى، وبعدين يطلع وزير التربية والتعليم يتكلم ووزير التعليم العالى يتكلم ووزير الأوقاف يتكلم ووزير الداخلية يتكلم وبعدين بناخذ استراحة.

سرى للغاية

الاتحاد الاشتراكى بتاع المنصورة يتكلم وإسكندرية يتكلم والمحافظ يتكلم، وبعدين ناخذ استراحة ونشيل التلفزيون والإذاعة.

العملية دى بتشد الناس معنا.. هيطلعوا الطلبة يتكلموا يعنى نشد البلد، ونكون مرتبين نفسنا على أساس إن احنا لازم نقنع البلد بأنه يجب القضاء على هذا. وممكن فيه طلبة يتكلموا ويستكروا وفيه طلبة وميتكلموش ويطلع اللى عايز يتكلم يتكلم.. الى آخر هذه العملية. واللى يقف يتكلم واحد يقف يقول له.. وأنا متصور يعنى النهارده سامى وشعراوى وعبد المجيد يتكلموا، وإن احنا نقدر يبقى معنا الأغلبية العظمى للمؤتمر، بنقول: "لا صوت فوق صوت المعركة" ويجب القضاء على كل الحراك وكذا، ونطلع بهذا يبقى سيسنا العملية.

الكلام ده ممكن نعمله يوم السبت أو الأحد أو الإثنين اللى جاى، وبعد هذا نبتدى نلم الولاد مش دلوقتى.. الولاد اللى هم معمولوش حاجة، ونخلص عملية الطلبة وعملية الأساتذة، ثم أيضا تبان المعركة العملية ده شئ أساسى وده طعن فى الظهر.. ده تقديرى للعملية.

أما النهارده إذا أخذنا قرارات بهذا الشكل بدون إن احنا نقنع الناس، النهارده بقول: لازم فعلا ننتهز الفرصة والبلد يعنى مش راضية عن هذه الأمور ونلم البلد كلها ونعزل هؤلاء الأولاد، ويبقى فى المؤتمر ويعنى حسن ده ممكن العملية تتعمل ونحسبها. أما رأى بالنسبة إذا أخذنا قرار لجنة تنفيذية عليا مش هيبقى بالتأثير؛ لأن لازالت البلد برضه هى الطرف. أنا بقول: لازم أقول لهم فى اللجنة المركزية: فيه البلد طرف لازم نحطه فى حسابنا.. فده الحقيقة التفكير اللى عندى ما عرفش إيه رأيكم؟

داوود: أنا مع ذلك.. أى إجراءات بتحصل.

عبد الناصر: هيقولوا قبضوا عليهم وهيقولوا عملوا وسوا.

شقير: وهى مش ميزة حلوة الميزة - زى سيادتك ما بتقول - البلد بتبقى طرف فى العملية بتبقى طرف بياخذ ويبدى فى الموضوع، ومن ناحية ثانية يبقى فيه قرار للمؤتمر بناء على قرار صادر من المؤتمر فعلا.

عبد الناصر: هو أنا الحقيقة ما بيهمنيش المؤتمر كمؤتمر، أولاً: يعنى بنبقى ناصبين نسبة البلد كلها قاعدة تشوف قاعدين نتكلم، ومش هنبقى قاسيين على الأولاد لكن نقول هذه الحقائق ثم ماذا؟

سرى للغاية

السادات: فيه معركة وعدو واقف.

عبد الناصر: إلا الانحراف والاستهتار! هو السؤال هل بنقدر نضبط المؤتمر؟ هو ده الحقيقة السؤال اللي أنا طالب عليه إجابة بكرة.

أبو النور: فى كل محافظة نعمل تقدير موقف لها يافندم.

عبد الناصر: هو يعنى دى فكرة مش عايزين حد يتكلم عنها لحد لغاية ما الواحد ما يحسبها مضبوط، ولا نجيب سيرة لحد من الصحفيين عن هذا الموضوع.. ده كاقترح عن طريق اللجنة المركزية. بس يبقى كاقترح يتقدم بيه، طبعا ده يستدعى إن اللجنة المركزية إن احنا نتكلم كلام مختصر علشان ميبقاش فيه تكرار هنا وهنا.

يعنى الحقيقة دى من هنا لبعد بكرة، ويوم الثلاثاء الواحد يكون رسى الموضوع نعمل حسبة لكل محافظة.. نحسب حساب صحيح مين ممكن يفلت؟ لكن الولاد اللي كانوا معتصمين طالب منهم إنهم يمسكوهم، والولاد اللي مسكوهم النهارده ودوهم على ٣٠٠، هم طالبين اتحاد الطلبة الإفراج عن الطلبة، وهدخل جرائم التجمهر والتظاهر لأمن الدولة.

داوود: يكون أفضل إن الصحف تنشر عن العملية دى كخبر مش داعى كبيان.

عبد الناصر: بكرة هينشروا خبر.

داوود: بدل ما يكتب فى الأهرام، يعنى الأهرام كاتب النهارده صفحة بحالها عن حادثة المنصورة!

سرى للغاية

عبد الناصر: يعنى هو يوم المنصورة الحقيقة إحنا احترنا نعمل إيه! يعنى العملية الأول أصل العملية ٤ قتلى.. فالموضوع أنا الحقيقة باثق فى الأهرام والتانيين مايتقش فيهم يقدروا يعملوا! لذلك أنا أفضل أقول للأهرام: فيه موضوع إعمله وضامن ١٠٠٪ هيطلع صح، لو إديته للتانيين لازم أقعد ساعة لغاية مايكتبوه ويقروه لى وأتأكد منه، وبعدين برضه يطلع غلط! هيكل بيبجى الساعة ٨ الصبح لغاية بالليل قاعد فيه، إنما التانيين.. يعنى فالأهرام مريح. بكره هو طالع بموضوع عن المنصورة، بعد كده طالع بموضوع عن بتوع جامعة إسكندرية.

والأولاد اللى هم مكرم والجماعة دول أولاد كويسين الصراحة، وبعدين أصلا كانوا منحايزين للطلبة النهارده ناقلين على الطلبة فى العملية.

داوود: محمد مكرم كويس أوى.

عبد الناصر: والتانى اللى كان برضه..

داوود: إحسان.

عبد الناصر: كانوا فى عملية فبراير مع الطلبة وكانوا متحمسين أوى، ففى العملية دى قالين! هى عملية المؤتمر الحقيقة أنا شايف برضه إن احنا نخش العملية إدارة.. إدارة وبرضه ١٧٠٠ واحد وقعدنا تتناقش، وبرضه دول ولادنا وولادكوا وولاد البلد وكذا ومستقبلنا ومستقبل البلد وكذا، هل هنسمح بالانحراف؟! وبعدين بعد هذا الحقيقة هو الغرض إن الأولاد يحسوا إنهم إنعزلوا على طول بقى نحدث حراسة الجامعة ومحدث فاهم إيه الولاد اللى نحطهم بناخدم، وبعدين هو برضه المؤتمر هيخوف الأساتذة.

يعنى العمليات اللى حاصلة دى، إحنا بنقول عندنا تنظيم فى العمال وعندنا تنظيم هنا، إنما دلوقتى معندناش تنظيم فى الطلبة! فيه سؤال إذا كنا مش قادرين نقود إذا نحكم.. يعنى إذا كنا عاجزين عن القيادة حتى نستطيع أن نقود.. إذا نحكم. إسماعيل صدقى كان بيحكم ومامعاوش حد فى العملية دى! وبرضه الحقيقة إن احنا الاتحاد الاشتراكى والكلام ده، وهم طلبة مش فاهمين إيه الاتحاد الاشتراكى وإيه اللجنة المركزية العليا! والوجه القديمة محصلش تغيير، وإحنا لازم نعمل تغيير.. الأساتذة بيقلوا لهم هذا الكلام.

سرى للغاية

لو فى المؤتمر العملية بتترتب ويتعمل قبلها مؤتمرات محافظات، وييجى المؤتمر على يوم الإثنين اللي جاي.

يعنى ممكن نقول إن ده مش موضوع يوم وليلة زى منظمة الشباب، يعنى زى ما طلع مفيد شهاب واتكلم وأنا رديت عليه الحقيقة، وبعدين ماحنا فاتحين لهم معسكرات مكلفانا الحقيقة مليون جنيه للتدريب والكلام ده.

داوود: الحقيقة الرأى العام بالنسبة للمعسكرات فى جميع المحافظات على كل المستويات بينكلم؛ على أساس مفيش ارتياح واقتناع لعملية التدريب! وهم قايلين.. الطلبة بيقلوا هذا الكلام.

عبد الناصر: هم عايزين إيه؟ عايزين ياخدوا فرقة صاعقة؟! صعب أوى دلوقتى فعلا الراجل العسكرى المستجد بقعده الحقيقة ٦ شهور يتعلم وبعدهم ٣ أشهر علشان أدربهم؛ يعنى هم الحقيقة بيتدربوا وبعدين مش عاجبهم حاجة خالص!

الشافعى: بيقلوا الأسبوع الأول ده كان البرنامج جاد جدا، وبعدين جم الأسبوع التانى كان مريح وفيه أكثر محاضرات وكلام زى ده، وضع أثر الأسبوع الأولانى!

داوود: الفكرة إن الطلبة لما ييجوا بموقف زى ده بيبقى جزء سلبي يالما جزء منحاز، ومفيش جزء له القدرة على التصدى لأن احنا مخلقناش الحقيقة لتنظيم سياسى يقوم بهذه الدور. فمن الأفضل إن احنا نعيد النظر فى منظمة الشباب لأن ده المدخل الطبيعى بالنسبة للشباب.

عبد الناصر: باتصور إن أكثر الولاد اللي السيئين هم أصلا كانوا أعضاء فى منظمة الشباب!

داوود: فى الواقع إحنا إديناهم معلومات وإديناهم معرفة واجتماعات، وبص لقى نفسه معزول ومحدث بيقل له: إنت فين؟! وحطينا له طاقة.. طاقة خلقناها إحنا وبعدين سييناها.. يالما ينقلب الى سلبي أو ينقلب الى ناقم! المفروض أنا أتصور إن لما يحصل حركة زى دى فى كلية هندسة، وبعدين يقوم فريق آخر ولو حتى أضعف يقول لهم: لأ.. حتى ولو يضربوا بعض!

سرى للغاية

عبد الناصر: وزى ما حصل عندنا فى سنة ٥٤.

داوود: لازم نوصل ليه وإلا هنفضل باستمرار نقاوم الطلبة اللى جوه بحاجة من بره إحنا عاوزين نعمل حاجة مقاومة داخلية تقدر تحل.

عبد الناصر: آه.. أنا عايز أنا كمان! (ضحك) يعنى هو أنا الحقيقة عملية الأحزاب بره بيحبوا أولا أولادهم وقرايبهم وجماعتهم فى المدارس هم اللى بيقوا أولاد أعضاء الحزب، بعدين جم الطلبة اللى كانوا بيطلعوا بالمظاهرات وجم تصدوا ليهم وضربوهم زى الكلام اللى بيقولوه. وبعدين دول طلوعوا بمظاهرة تهتف بشكل ودول طلوعوا بمظاهرة تهتف بشكل! وفى جامعة الخرطوم، الإخوان المسلمين والشيوعيين وضربوا بعض وواحد مات! فى منظمة الشباب هنحاول نعمل تنظيم لكن ماشى على طريقة مش نلم ناس بواحد بواحد، بس ده عايز وقت الحقيقة ضرورى.

أبو النور: الحقيقة أنا حاسس بالصورة، إن احنا عندنا ٢٥٠,٠٠٠ واحد أظن أو حاجة زى كده فى منظمة الشباب بيتدربوا، ومنهم ناس قطعاً وصلوا لدرجة من الفكر إنهم بيقروا ويطلعوا وبيتحركوا وعندهم ثقافة، وبعدين فى فترة الركود دى من الخطر إن أنا هاسيبيهم؛ لأنه هيتحول ضدى بشكل..

عبد الناصر: هو المنظمة ماشية فى كل المحافظات ماعدا الطلبة.

أبو النور: إحنا بعتنا لهم فى كل المحافظات للأمناء، إزاي نعمل للشباب؟

عبد الناصر: وقلت لعلى على أساس إن المنظمة تمشى فى كل العملية ماعدا الطلبة، لازم نحسب المنظمة وجود الطلبة هيعمل إيه؟ وبعدين أو هنعمل تنظيم طلابى غير المنظمة، أنا رأيتى هنعمل حاجة غير المنظمة قد تستوعب بتوع المنظمة أو جزء منها، لكن منظمة الشباب تمشى زى ما هى ونعمل تنظيم طلابى لأن الحقيقة هو التنظيم الطلابى هو المهم.

سرى للغاية

أبو النور: كان فيه ظهر بعض الحركات فى بعض المنظمات فى الأقاليم وبعدين تراجعوا، علشان المنحرفين يخلصوا منهم.

داوود: نسبة الحركات اللى فيها أقل قطعا من نسبة الاتحاد الاشتراكى؛ الاتحاد الاشتراكى واخذ وضعه وفارض وجوده الى حد ما. يعنى النهارده إحساسهم فى كل اللى بيتكلموا إحساسهم إن بيقولوا: منين إحنا عايزين بنقول إن الشباب والشباب وعايزين نبني الشباب، وبعدين الشباب اللى احنا ربنا..

عبد الناصر: أنا تصورى والمنظمة قايمة فى كل حته على الطلبة.

داوود: حتى بيطلبوا منا لما بنروح إنه حلونا من الموقف ده إتحركوا، يمكن فيه حاجة وراء اللى حصل فى المنصورة أساسها الرئيسى فيه صراع مابين منظمة الشباب القديمة كلها وأجهزة الاتحاد الاشتراكى القائمة. لذلك بيقولوا: الاتحاد الاشتراكى ليس له دور ولا سيطرة داخل المعاهد العلمية كلها؛ يعنى أى شئ ممكن أن يحدث والاتحاد الاشتراكى مايعرفش عنه حاجة!

عبد الناصر: هل منظمة الشباب فى المحافظات تبقى تابعة للجنة المركزية فى القاهرة ولا تابعة للاتحاد الاشتراكى فى المحافظة؟ أيضا هذا موضوع الحقيقة عملية ان منظمة الشباب تبقى تابعة مباشرة للقاهرة، أنا غير موافق عليها وتبقى تعليمات متناقضة. فإحنا الحقيقة نقدر نبتدى منظمة الشباب ونعمل مسئول شباب فى كل محافظة وتابعة للأمانة وتابعة للمحافظة، عملية الحقيقة للجنة المركزية للشباب موضوع نفكر فيه مهواش الموضوع العاجل.

أبو النور: هو ممكن بس التخطيط إزاي نمشى؟

عبد الناصر: التخطيط المركزى فلتت وبقى كل واحد عايز يعمل نفسه زعيم فى العملية دى ومعاه الشباب، وده الموضوع اللى هو حصل حملة على منظمة الشباب فى الجيش، وقالوا: إن منظمة الشباب قايمة بتتعمل عشان تبقى نقف للجيش! وانتقال مواضيع حساسة جدا، وانتقال: إن منظمة الشباب عاملة مشروع كيف تواجه أى عمل يقوم به الجيش! المواضيع دى الحقيقة أخطر مواضيع ممكن تقابل الواحد.

سرى للغاية

أنا يعنى لما جه سيكتورى يعمل حرس شعبى، أنا قلت له: لازم يتبعوا الجيش وإلا هيجيب له مشكلة الجيش على طول؛ الحرس يبقى معانا لكن الجيش يبقى إيه؟! نفس الغلطة الحقيقة إحنا كنا هنغلطها، يعنى إحنا لما عملنا جيش تحرير مستقل وبعدين على طول أنا لحقته بالجيش. وأما ابتدى يتقال للجيش إن منظمة الشباب بتعمل مشروعات كذا، ولدرجة إن بقى فيه فى الجيش حملة مركزة ضد الاتحاد الاشتراكى ومنظمة الشباب.

أبو النور: شئ من التخطيط يعنى إزاي ينظم الشباب إزاي يقرر؟

داوود: إنصافا لبتوع الدقهلية مش لحد.. الواقع اللي حصل بالنسبة للشباب فى الدقهلية بالذات - وأنا يمكن قلت كده لهم - إن لما جه محمد المصرى أمين الاتحاد هناك، لم يجد من يستطيع إنه يتعاون وياه من كل القيادات اللي كانت موجودة غير الشباب؛ فحملهم كل مسئولية العمل السياسى فى المحافظة كله.. إدالهم المسئولية. أمين الشباب كان طقم واحد موجود من ناحية الواقع السياسى، كل أمناء الشباب على كل المستويات ضرب بيهم اللجان اللي تعبانة واللجان المنحرفة، والجيوب الاقطاعية اللي كانت موجودة فى الدقهلية ضخمة جدا ومعادية وكلها عائلات والحزبية متأصلة فيها. ده الواقع اللي حصل فى الدقهلية، وقد يكون بعضهم أساء استعمال السلطة الى حد ما إنما العملية ابتدت تاخذ عمليات تشنيع ضدهم بهذا الشكل.

السادات: فيه جزء من المحافظة دلوقتى للعمل السياسى، وجه وأنا بسأل وإحنا قاعدين اللجان وبيحكوا لنا القصة كلها وبيحكوا على المظاهرة وإيه اللي جرى و.. و.. واحد وبيسأل السؤال هل يصح البوليس يقتل ٨ ومين المسؤول عن هذا؟! وبينتكم بلسان الطلبة. فاللجنة قامت حكى له، قال لها: أنا مش هقول الكلام ده بره.. ده أنا بقوله بس فى التنظيم.. ده طلع من شلة الجماعة اللي قالوا لنا عليهم وشيوعى وهم كتلة معروفة شيوعية.

سرى للغاية

عبد الناصر: هو الكلام ده طالع فى برقيات، إن الجماعة اللي سقطوا فى الاتحاد الاشتراكى هم اللي عاملين عملية المنصورة والقيادات القديمة بتاعة الاتحاد الاشتراكى..

داوود: يعنى مثلا أمين بندر المنصورة يُحذف من الانتخابات اللي فاتت؟! أمين منظمة الشباب فى المحافظة مُنع من الانتخابات اللي فاتت دى! وطبعاً كل واحد من دول وراه جيش من الناس اللي مرتبطين معاه وببشغلوا معاه ٣ سنين و ٤ سنين فى العمل السياسى. كل التيارات موجودة النهارده وبتتفاعل داخل العمل، لكن ده على الأقل من إنه القوة اللي نقدر نعتمد عليها علشان تحرك أى حاجة مش معانا النهارده، تنظيمات جديدة لسه ملحققتش تربط الناس بها.

عبد الناصر: أمين الشباب حذف ليه؟

أبو النور: الكلام على أساس إنه حصل صراع بينه وبين الاتحاد الاشتراكى، ثم حصل فى الفترة بتاعة بعد النكسة إنه عمل نفسه رقيب على التليفونات على كل المسئولين الموجودين فى المحافظة! هو فيه كتلة شيوعيين فى التربية والتعليم وأصلاً من المدربين بتوع الشباب.. شباب المحافظة الموجودة.

عبد الناصر: نفكر فى موضوع المؤتمر ده ولا؟

أصوات: نعم.

صوت: يعنى هو الواحد بيفكر إزاي يربط الناس دى معاه.

عبد الناصر: نجيبه المؤتمر ده دلوقتى، وبعد كده نأجله ٣ أشهر! (ضحك) نجيبه وإحنا نقعد يومين ثلاثة.

صوت: الثلاثاء والأربعاء.

عبد الناصر: ممكن يعنى يوم ممكن، هو السؤال بس هل العملية دى هتكون فى جانبنا ولا ضدنا.

سرى للغاية

أبو النور: عشان سيادتك تتأكد إحنا نستطلع العملية من بكرة.

داوود: بالتأكيد يعنى عايز أقول إن الأسبوع اللي فات عملنا عمليات سياسية برضه.

عبد الناصر: الحقيقة أنا عندى المؤتمر أحسن من اللجنة المركزية، وأنا برضه فى بيان ٣٠ مارس حكاية إن المؤتمر ٣ أشهر لنقول ٥ سنين. الحقيقة أنا قلت: إن عارف الفترة دى هطول وكل الناس هيزهقوا! ونقعد جمعة ونتكلم وده بيتكلم ونلاقى الكلام خلص واللى عنده كلام يقوله. وأنا رأى الطلبة عايزين يقوموا يتكلموا، لكن لازم نجهز نفسنا إن احنا نخليهم فى موقف الدفاع.

شقيب: سيادتك المؤتمر ده هناخد جزء من الطلبة هناخد الشيوعيين..

السادات: ولا صوت هيطلع لهم ولا حد يجروء يتكلم.

أبو النور: لا.. هو الولد ده اللي أنا بحكى عنه بالذات فى القليوبية وماشيين مع خالد.. بتاع الدقهلية اللي كان عمل حركة المؤتمر لما قدمنا الورق وكل محافظة قدمت ورق.

عبد الناصر: إحنا يوم الأربعاء، الحقيقة نتكلم فى اللجنة يعنى نحط هذا الاقتراح بس برضه مايجبش الكلام يتسرب بأى شكل من الأشكال، بحيث برضه فى رأى الناس هيستجيبوا لهذا ويجدوا إنها فرصة كويسة ونكون حسبنا الحسبة كويس برضه؛ لأن إذا حتى اتسرب ولقينا الحسبة مش مضبوطة..

صوت: هناك فكره برضه إن احنا بننزل نشرة تنظيم عن الحوادث.

فوزى: التخوف من حاجتين.. التهوين والتهويل! يعنى فيه ناس شافوا الصورة بلون وردى وكل حاجة حلوة وفيه ناس بتقول: كل حاجة غامقة؛ بس الواقع لا ده ولا ده بس فيه ناس يحبوا يحطوا كل حاجة..

عبد الناصر: إنت هتتكلم يوم الأربعاء..

سرى للغاية

السادات: إذا كان فيه داعى فيه، مفيش يعنى أنا بقول جلسة يوم الأربعاء..

عبد الناصر: تنظيم الاتحاد الاشتراكى العربى؟

السادات: إحنا معدناش فى هذا الموضوع إلا نقطة واحدة، الموضوع ده بينقسم الى نقطتين ياريس..

النقطة الأولى: عملية مجلس الأمة اللى هى جاية عاجلة.

النقطة الثانية: العلاقة على المدى الطويل، طبعا العلاقة على المدى الطويل مفيش وجه للاختلاف، إنما الكلام على الترشيح كله جيت أمناء المحافظات جميعا.. وجميعا قالوا رأيهم فى عملية الترشيح.

فيه نقطة معمولة فى البحث هنا فى المذكرة بالنسبة للترشيح، فى الأحزاب الشرقية والأحزاب الغربية الإثنين مفيش حد بيسيب مرشح ينزل من نفسه أبدا؛ يعنى مثلا فى الديمقراطية الغربية لازم الحزب بيتقدم بمرشح مش أى حد بينزل لوحده. فى أمريكا إذا كان فيه واحد عايز ينزل مستقل لوحده بيشرط إنه لازم يجيب توقيعات، ومثلا فى ولاية نيويورك لازم ٢٠٠٠ توقيع وكل ولاية بيختلف العدد عن الولاية الثانية إنما لازم يقدر يجيب ٢٠٠٠ توقيع تزكية علشان يقدر ينزل، إنما مفيش حد أبدا بيسيها مفتوحة منها لنفسها كده.

كنا بنتكلم حتى على إنه يعنى عملية إن منه لراسه منه كده وخلص يروح يقدم، دى مفيش حتى فى أمريكا اللى هى بيقولوا عليها ديمقراطية، طبعا الأحزاب فى انجلترا معروفة.

عبد الناصر: يجيدوا القراءة والكتابة يعنى!

السادات: لا.. بتوع المخدرات، الحاجات اللى طلعت.

أما بالنسبة لأسلوب تدخل الاتحاد الاشتراكى فى اختيار المرشحين، فقد تعددت الآراء حول هذا الموضوع.. نوجزها فيما يلى:

فيما يتعلق بالتزكية للترشيح، أن يكون للوحدات الأساسية الدور الأول فى عملية التزكية بالترشيح؛ اللى هو اللجان العشر فى كل دائرة تتبع اللجان العشرة فى كل دائرة وهى اللى تزكى المرشح.

سرى للغاية

ثانياً: أن يسند هذا الدور لمؤتمرات المراكز والأقسام والبنادر مع أمناء الوحدات الأساسية.
ده رأى القاهرة والجيزة اللى بعتهولنا، القاهرة والجيزة بعنوا رأيهم بيقولوا: إن احنا رأينا يكون الآتى:

يترك أى عدد يرشح نفسه، وبعدين يجتمع مؤتمر المركز ومعاة لجنة المحافظة، وبعدين يعرض على مؤتمر المركز ولجنة المحافظة المرشحين ويصفيهم المؤتمر على مرشحين اثنين لكل دائرة اللى هم مطلوبين يعنى، وبعد ذلك دول بيقوا معروف إن دول بتوع الاتحاد ودول اللى واقف ورائهم.
رأى تانى: أن يكون للتنظيم قائمة تتضمن ضعف العدد المطلوب أو العدد الذى يتناسب مع عدد سكان الدوائر.. ده رأى تانى.

رأى ثالث: أن يكون للتنظيم طريقة تكلف جميع مستويات التنظيم بالعمل على إنجازها فى مختلف الطوائف، دون أن يحول ذلك دون دخول عناصر أخرى - اللى هو زى اللى فى القاهرة والجيزة - ويكون للتنظيم قائمة واحدة تتضمن مرشحين اثنين لكل دائرة، وبيأيدوا أعضاء كثير إنه التنظيم يخش بقائمة واحدة.

وبعدين فيه رأى أخير بيقول: إنه التنظيم فى الاتحاد الاشتراكى مايشخس لإنجاح حد، لأ.. بيسيب الناس كلها الكويسة، لكن يتدخل لإسقاط من يريد أن يسقطه من العناصر الوحشة العناصر السيئة.

فيه رأى بقى بيتطلب بيقى كل ده على قانون الانتخاب الحالى.
فيه رأى جديد محتاج لتعديل القانون، بيعتبر المحافظة كلها وحدة انتخابية وإتعدلت الدوائر يجرى الانتخاب فيها بالقائمة للدوائر جميعاً؛ يعنى قائمة واحدة تنزل للمحافظة بجميع نوابها وتنتخب فى جميع المحافظة مرة واحدة.
ده خلاصة الكلام اللى قالوه.

عبد الناصر: هو أهم من الكلام ده كله، لو بيكون للاتحاد الاشتراكى الحق فى سحب الثقة لأن النائب إذا إنحرف! إحنا هنا الحقيقة بقى الموضوع معرفش إيه رأيك يا ضيا؟

داوود: هو الحقيقة العملية صعبة، بس النقطة اللى الواحد يفكر فيها إنه لو صح إن احنا نقدر نسيطر على لجان بتاعتنا بتاعة الاتحاد الاشتراكى ونوجهها، وتكون أدوات لنا فى التنفيذ لو هى تضاربت مع بعضها يعنى لو..

سرى للغاية

عبد الناصر: اللجان كلها مفهاس حد.

داوود: إنما من السهل إن احنا نعمل هنا عملية ارتباط تنظيمى، بحيث إن كل اللى على نية إن هو يرشح نفسه من الأعضاء اللى فى اللجان المنتخبة، لازم يكون لنا حق التوجيه والاختيار بينهم على الأقل بحيث إن هو يحصلش..

عبد الناصر: وإحنا مانقدرش الحقيقة هو لو أنا أصح فى هذا، لو تقول: إن يجتمعوا كلهم ويتفقوا على واحد قبل العملية، ونطلع إحنا منها لأن هيبقى الكلام اللى عندنا ده لما نقول إن كل مركز يجتمع مثلاً مؤتمر من المركز ويتفقوا على مين الناس القيادين هيدخلوا ده معقول، لكن بعد كده هل هتمنع الباقين أى حد تانى؟ مانقدرش!

أبو النور: إحنا كنا عايزين نناقش هذه النقطة، يعنى هل هانسيبها مفتوحة أو مثلاً الاتحاد يرشح اثنين أو يرشح ناس له ويسيب الباقي مفتوح؟ فكل واحدة من دول لها مزاياها ولها عيوبها. سيادتك تسمح لى أقترح نقطتين فى هذا الموضوع.. أول نقطة: إن الموضوع مفتوح على أساس إن اللى ينحرف تسقط عنه عضوية الاتحاد الاشتراكى.. دى عايزة تعديل فى الدستور. النقطة الثانية: اللى هى..

عبد الناصر: ده ممكن تعديله بواسطة اللجنة المركزية.. ممكن تعديله؟

السادات: آه.. إعلان دستورى.

أبو النور: النقطة الثانية: إن الاتحاد يتفق على ناس بيعتبرهم مرشحين صالحين ويبدعمهم دون إعلان.

عبد الناصر: هو أنا الحقيقة فى تصورى بالنسبة للموضوع، أنا رأيت إن لو ترك الباب مفتوح لكل وده بيرحنا، وده بييجى الحقيقة مشكلة واحدة.. إن اللاتحاد الاشتراكى سيتفسخ لأن اللجان كلها هتدخل ويطلعوا يرشحوا ناس ويبيعوا يشتمو فى بعض. فإذا بنعمل الآتى:

سرى للغاية

أعضاء لجان الاتحاد الاشتراكى اللجان، تقعد فى الدائرة أو فى المحافظة أو فى المركز لأى حاجة، هو الناس اللى هيترشحوا.. هيترشحوا منين؟ يامن لجنة المحافظة يامن لجنة المركز يامن المؤتمر.. الى آخر العملية.

السادات: هو المركز هو اللى بيمثل دائرة دلوقتى.

عبد الناصر: ويقرروا مين منهم اللى ينزل واحد عامل وواحد فئات - غير ترشيح الاتحاد - كلهم يقعدوا مع بعض حفاظا على الاتحاد الاشتراكى وعدم التفسخ وكذا وإنهم بيتفقوا على مين بالأغلبية، وبعدين كلهم بالصندوق لأن برضه فيه ناس ممكن هيسقطوا.

داوود: العناصر اللى بره التشكيلات المنتخبة اللى عاوزة ترشح نفسها؟

عبد الناصر: مانقدرش نمنعها.

داوود: هيبقى شكل العملية كإن احنا بنقصر مساندة الاتحاد الاشتراكى للأعضاء المنتخبين فى أى مستوى من المستويات لأن قد يكون بره عناصر مش وحشة، وفيه مثلا ناس قال لك أنا ماخشش أتتافس، ولما بييجى مجلس الأمة فى نفس الجو لما أخش بلا عداوات ولا خصومات ولا منافسات.

عبد الناصر: هو إذا أنا تركت العملية للاتحاد الاشتراكى كلهم هيترشحوا، والاتحاد سيتفسخ وهتبقى عداوات!

السادات: الأمناء كلهم قالوا كده.

عبد الناصر: هو ده برضه اللى..

داوود: ليس المقصود بالضرورة إنه يبقى المرشح أحد الأعضاء المنتخبين، قد يقع الاختيار على غيره.

سرى للغاية

عبد الناصر: آه.. المنتخبين يتفقوا على حد تانى.

داوود: ممكن مثلاً.

عبد الناصر: هو فى الاتحاد السوفيتى يقول لك إيه، كل واحد عايز يرشح نفسه بيوقف قصاد النقابات والهيئات وبعدين هم اللي بيختاروا مين اللي هينزل الانتخابات، وهيبقوا هم رشحوا وبعدين يروحوا يصوتوا له.

داوود: نقول مثلاً الطريقة اللي اتقالت دلوقتى، إن كل مرشح بيحصل على التزكية من كذا عضو ونقول مثلاً من كذا عضو من أعضاء لجان العشرة اللي واقعة فى الدائرة اللي هو رشح نفسه فيها أو أى مستوى من المستويات؛ وبهذه الصورة نقدر إحنا نعمل توجيهات تنظيمية بالنسبة للناخب.

عبد الناصر: لجان العشرة عارف كام؟ ٧٠٠٠ ولآ؟

أبو النور: ٧٠٠٠.

عبد الناصر: ٧٠٠٠ لجنة!

استينو: بعضهم مدخلش.. فيه ناس مدخلتش.

شقيير: إحنا لازم عدد من النقط..

النقطة الأولى: إن مانقسمش الاتحاد الاشتراكى.

النقطة الثانية: إن مانخدش على المستوى المركزى مسئولية الترشيح وإلا العملية هتبقى فى

وشنا كلنا.

النقطة الثالثة: إن منسبش العملية مفتوحة فى وش الحزب.

الثلاث أهداف يعنى الاقتراح اللي قلته سيادتك يحقق كل ذلك.. يعنى مانقسموش بينهم وبين

بعض إلا فى العملية.

سرى للغاية

عبد الناصر: يتفقوا على اثنين ويسيوا حد بره.

شقىر: ده اللى بقوله يافندم، هل نسيب بره يدخل؟ إن لو سبنا بره يدخل هنرجع لـ ٣٦٠ حزب!

عبد الناصر: هل بره هينجح؟

شقىر: ممكن بره ينجح منه؛ على أساس إن فيه بعض الجهات قد تكون بعض وحدات الاتحاد الاشتراكى لأسباب معينة إكتسبوا العداوة هنا.. هنا.. هنا.

عبد الناصر: أنا رأى تسبب بتوع اللجنة المركزية يتكلموا قبل ما ندخل، وإحنا برضه هتشوف الاتجاه ماشى إزاي.

السادات: والأمناء ياريس نسمع كلامهم؛ لأن مثلا الأمناء فيه جزء كبير جدا منهم بيقول: مدخلش. الاتحاد معركة إن يبقى لهم مرشح أبدا، ولما ينجح الثانى اللى قصاد الاتحاد هتبقى مصيبة وكارثة! ففيه كثير من الأمناء بيقولوا: بلاش الاتحاد يخش.
نسمع آرائهم ونسمع مناقشاتهم.

عبد الناصر: متشكرين.. السلام عليكم.

أصوات: مع السلامة ياريس.